

TVET bantu lahirkan tenaga kerja bernilai tinggi

KUANTAN - Pendidikan dan Latihan Teknikal dan Vokasional (TVET) perlu diberi tumpuan khusus dalam usaha melahirkan tenaga kerja berpengetahuan, berketrampilan, inovatif dan bernilai tinggi.

Tengku Mahkota Pahang, Tengku Hassanal Ibrahim Alam Shah Al-Sultan Abdullah Ri'ayatuddin Al-Mustafa Billah Shah bertitah, TVET dan perkembangan teknologi kecerdasan buatan (AI) memainkan peranan penting dalam pembangunan modal insan berkemahiran tinggi dan berdaya saing di peringkat global.

Titahnya, TVET juga menyediakan peluang kepada pelajar untuk memperoleh kemahiran praktikal yang relevan dengan keperluan industri.

"Ia sekali gus membantu me-

ningkatkan kebolehpasaran graduan dan mengurangkan kadar pengangguran serta melahirkan graduan bergaji premium.

"Pemeriksaan TVET bagaimanapun memerlukan kerjasama erat antara kerajaan, institusi pendidikan dan pemain industri dalam menyediakan kurikulum yang relevan, latihan berkualiti dan peluang pekerjaan selari dengan kemahiran diperolehi," titah baginda.

Tengku Hassanal bertitah demikian dalam titah diraja sempena Majlis Perasmian Jom Masuk U (JMU) 2024 Zon Timur II di Dewan Kompleks Sukan Universiti Malaysia Pahang Al-Sultan Abdullah (UMPSA), Kampus Gambang di sini pada Sabtu.

Tengku Hassanal yang juga Pro Canselor UMPSA bertitah, program

Jom Masuk U adalah satu inisiatif yang dapat membantu pelajar dan ibu bapa mendapatkan maklumat terkini dan tepat mengenai peluang melanjutkan pengajian ke institusi pengajian tinggi (IPT).

"Saya harap semua pelajar memanfaatkan peluang ini sepenuhnya untuk merancang masa depan dengan lebih teratur.

"Antara cabaran sukar pelajar dalam menentukan kelestarian akademik di peringkat lebih tinggi adalah pemilihan program pengajian selari dengan kebolehan mereka.

"Sekiranya perkara itu tidak diberi perhatian sewajarnya, mereka mungkin tersalah pilih program dan seterusnya menghadapi kesulitan semasa mengikuti pengajian," ujar baginda.



Tengku Hassanal (kiri) ketika melawat reruai yang mengambil bahagian pada program Jom Masuk U 2024 Zon Timur II di Dewan Kompleks Sukan UMPSA, Kampus Gambang pada Sabtu.